

Duodji

Ovdalaš olbmot dahke visot ieš, sii gorro biktasiid ja duddjojedje buot atnugálvvuid. Dievddut dahke garraduiid, muhto okta olmmoš ii dárbašan máhttit juohke áidna gálvvu ieš dahkat, muhtin olbmot ledje čeahpit muorraduiin, nuppit ledje rávdit. Nissonolmmoš galggai dahkat buot dipmaduiid, máhtii son dahje ii. Sivvan dasa sáhtii leat dat, ahte dipmaduojit ledje juohke beaivásaš atnugálvvut go garraduiin lei olu guhkit geavahanáigi.

Dála duddjon lea rievdan, ovdamearkan dal ii leat šat dárbu gárvvuid goarrut dego ovdal. Gákti lea čikŋabivttas, muhto ovttaskas gárvvuid dego nuvttohiid gal geavahuvvo árgabeaivvis.

Sápmelaš bajásgeassimis mihtilmas lei, ahte mánná oassálasttii rávesolbmo bargguide. Son barggai ovttas rávesolbmuin, čuovui mielde dassáži ahte čájehii beroštumi iešnai geahččalit. Rávesolmmoš, eatni dahje áhčči, áhkku dahje áddjá, attii mánnái vejolašvuoda geahččalit. Dáidduid lassáneami mielde mánná oaččui eambo ovttasvástádusa ja váddásut bargguid.

Ovttasvástádusa addin sihkarasttii, ahte mánná vikkai doaimmahit barggu nu bures go vejolaš. Rávesolmmoš muitalii barggadettiin barganvugiid, ávdnasiid ja bargoneavvuid birra ja maiddái das, maid ii gánnet bargat. Seammás bohte ovdii jaskes dieđut: movt juste min sogas lávejit dan dahkat, makkár vierut mis leat ja mot dat spiehkastit eará bearrašiin dahje sogain.

Vásáhusaid bokte oahppama ja čuovvumiin oahppama metodihka gánneha sirdit dála sámemánáid bajásgeassimii. Lea dehálaš sirdit mánáide dáidduid ja dieđuid duddjomis ja dujiid iešvuodain. Dat gáibida rávesolbmuin hálu duddjot, doallat ávdnasiid olámuttus ja muitalit dujiin. Go mánná dovdá ahte háliida geahččalit, sus lea dása vejolašvuhta, beroškeahttá das leago plánejuvvon duddjonáigi vai ii.

Bigga-Helena Magga